

## II - ARABAKO LURRALDE HISTORIKOAREN TOKI ADMINISTRAZIOA

### LANTZIEGOKO UDALA

#### Lankidetzaren hitzarmena Euskal Autonomia Erkidegokoarekin, agiriak erregistratzeko

Herri Administrazioen Araubide Juridikoaren eta Administrazio Prozedura Erkidearen Legean xedatutakoarekin bat etorritik, osorik argitaratuko da Euskal Autonomia Erkidegoko Administrazioak eta Lantziegoko Udalak izenpetutako hitzarmena, Euskal Autonomia Erkidegoko zuzendutako idazkiak udal erregistroetan aurkezteko lankidetzari buruzkoa.

Euskal Autonomia Erkidegoko Administrazioaren eta Lantziegoko Udalaren arteko hitzarmena, Herri Administrazioen Araubide Juridikoaren eta Administrazio Prozedura Erkidearen azaroaren 26ko 30/1992 Legearen 38.4.b) artikulua aplikatuz.

#### **Euskal Autonomia Erkidegora zuzendutako idazkiak udal erregistroetan aurkezteko lankidetzaren**

Josu Iñaki Erkoreka Gervasio Gobernantza Publiko eta Autogobernu Saileko Sailburua, Euskal Autonomia Erkidegoko Administrazioaren izenean, eta

Itziar De Alava Martinez de Icaya andrea, Lantziegoko Udaleko alkate-lehendakaria, udal horren ordezkari.

Hurrenez hurren, esleitura dauzkaten eskumenak erabiliz dihardute; alde batetik, Gobernantza Publiko eta Autogobernu Sailaren egitura organiko eta funtzionala ezartzen duen apirilaren 11ko 71/2017 Dekretuan; bestetik, Gobernu Kontseiluaren 1996ko urriaren 29ko Erabakian, bertan onartu baitzen toki erakundeekin hitzarmenak formalizatzea, Herri Administrazioen Araubide Juridikoaren eta Administrazio Prozedura Erkidearen azaroaren 26ko 30/1992 Legearen (aurrerantzean 30/1992 Legea) 38.4.b) artikuluan aurreikusten dena betetzeko; eta bestetik, Toki Araubidearen Oinarriak arautzen dituen apirilaren 2ko 7/1985 Legean eta Toki Araubidearen indarrean dauden lege xedapenen Testu Bateratuan (apirilaren 18ko 781/1986 Legegintzako Errege Dekretuz onartua).

Aldeek elkarrizkari aitortzen diote bakoitzak esku hartzen duen gaitasuna, baita hitzarmen hau egiteko legezko ahalmen nahikoa ere, eta helburu horrekin, honakoa:

Adierazten dute

30/1992 Legeak 38.4.b) artikuluan xedatzen du herri administrazioen organoetara zuzendutako eskaera, idazki eta jakinarazpenak hauen edozein administrazio organoren erregistroetan aurkeztu ahal izango direla: Estatuaren Administrazio Orokorra, autonomia erkidegoetako edozein administrazio, probintzia diputazioetako eta uharteetako kabildo edo kontseiluetako edozein administrazio, Toki Araubidearen Oinarriak Arautzen dituen apirilaren 2ko 7/1985 Legeak 121. artikuluan jasotako udalak edo toki administrazioa osatzen duten erakundeetako bat, azken kasu horretan baldin eta dagokion hitzarmena izenpetu bada.

Aipatutako agindua aplikatuz, eta herritarrei gaur egun dauden herri administrazio desberdinekiko harremanak errazteko asmoz, orain izenpetzen den hitzarmenak gauzatu egiten du hartan esku hartzen duten administrazioek duten borondatea, herritarrek EAEko Administrazioaren edozein organori edo erakunderi zuzendutako dokumentuak balio osoz Lantziegoko Udalaren erregistroetan aurkezteko.

Horregatik, esku hartzen duten administrazioek hitzarmen hau formalizatzen dute, klausula hauen arabera.

#### Klausulak

Lehenengoa. Hitzarmen honen helburua da herritarrei aukera ematea Lantziegoko Udalaren erregistroetan aurkeztu ahal izateko EAeko Administrazioari eta hari lotuta edo haren menpe dauden eta berezko izaera juridikoa duten zuzenbide publikoko erakundeei zuzendutako eskaerak, idazkiak eta jakinarazpenak.

Bigarrena. EAeko Administrazioari eta hari lotuta edo haren menpe dauden eta berezko izaera juridikoa duten zuzenbide publikoko erakundeei zuzendutako eskaerak, idazkiek eta jakinarazpenek Lantziegoko Udalaren erregistroetan duten sarrera eguna baliozkoa izango da interesdunek epeak bete ditzaten, eta horretarako, Administrazio Publikoen Administrazio Prozedura Erkidearen urriaren 1eko 39/2015 Legeak 30. artikuluan xedatutakoa aplikatuko da.

Hirugarrena. Lantziegoko Udalak konpromiso hauek hartzen ditu:

a) Bere erregistroetan onartuko ditu EAeko Administrazioari eta hari lotuta edo haren menpe dauden eta berezko izaera juridikoa duten zuzenbide publikoko erakundeei zuzendutako eskaerak, idazkiak eta jakinarazpenak, edozein dela ere haien lurralde kokapena.

b) Bere erregistroetan EAeko Administrazioari zuzendutako eskaera, idazki eta jakinarazpenen sarrera jasotzea, idazpenetan hauek adierazita: zenbakia; zer-nolakoak diren adierazten duen epigrafea; sarrera eguna; zein egun eta ordutan aurkeztu diren; interesdunaren identifikazioa; hala badagokio, zein administrazio organok igortzen duen, eta zein pertsona edo administrazio organori bidaltzen zaion eta, hala badagokio, jaso den idazki edo jakinarazpenaren edukiaren erreferentzia. Hori guztia 30/1992 Legeak 38.3 artikuluan eta bigarren xedapen gehigarrian xedatutakoarekin bat etorritik.

c) Behin erregistratu ondoren, berehala bidaliko dira agiriak bidali beharreko organo edo erakundeetara, berariaz adierazita irteera eguna, betiere agiriok jaso eta hurrengo bi egunak igaro baino lehen. Erabili beharreko bideak erabiliko dira agiriak albait arinen jaso daitezten, ahal dela teknika eta baliabide elektroniko, informatiko eta telematikorik egokienetara jota, 30/1992 Legeak 45. artikuluan eta horrekin bat datozen gainerako arau eta xedapenek xedatutako berme eta betekizunekin.

Laugarrena. EAeko Administrazioak konpromiso hauek hartzen ditu:

a) Lantziegoko Udalarik EAeko Administrazioa osatzen duten eta hari lotuta edo haren menpe dauden organo eta erakundeen berri emango dio, aldian behin informazio hori eguneratuz.

b) Lantziegoko Udalarik herritarrei informazioa emateko tresnak emango dizkio, herritarrak EAeko Administrazioaren eta hari lotuta edo haren menpe dauden zuzenbide publikoko erakundeen funtzioez eta jardueraz jakin dezan.

c) Eman beharreko laguntza teknikoa eta lankidetzak emango dio erregistroen antolakuntzaz eta informatizazioaz.

Bosgarrena. Hitzarmenean esku hartzen duten administrazioek elkarri informazioa emango diote interkomunikazio sistemen bateragarritasunari eragin diezaioketen erregistroak informatizatzeko neurriez, eta, hala badagokio eta bere garaian, elkarren erregistroen bateragarritasun informatikoa eta koordinazioa bermatuko duen lankidetzak hitzarmena formalizatuko dute.

Seigarrena. Hitzarmen honetako indarraldia Administrazio Publikoen Administrazio Prozedura Erkidearen urriaren 1eko 39/2015 Legeak jasotako erregistro elektronikoari buruzko aurreikuspenak indarrean sartu arte izango da, eta gehienez ere, 4 urtekoa izango da, hitzarmena Euskal Herriko Agintaritzaren Aldizkarian argitaratu ondorengo egunetik aurrera.

Era berean, hitzarmenaren indarraldia iraungituko da: a) esku hartzen duten administrazioen arteko adostasunez, eta b) horietakoren batek bere kasa hartutako erabakiz, frogatzen bada beste alderdiak, era larrian, ez dituela bete bere gain hartutako betebeharrak.

Hitzarmenaren formalizazioa eta iraungitzea Euskal Herriko Agintaritzaren Aldizkarian, Arabako Lurralde Historikoko Aldizkari Ofizialean eta Lantziegoko Udalaren iragarki taulan argitaratuko dira.

Zazpigarrena. Hitzarmen honen interpretazio eta aplikazioan sor litezkeen zalantzak eta auziak Gobernantza Publiko eta Autogobernu sailburuak ebatziko ditu izaera exekutiboz. Haren ebazpenen aurka administrazioarekiko auzien jurisdikziora jo ahal izango da.

Eta agiri honetan jasotakoarekin ados daudela erakusteko, eta behar den tokian hala jasota gera dadin eta eragin beharreko ondorioak eragin ditzan, alderdiek hitzarmenaren jatorrizko bi ale izenpetzen dituzte, goiburuan jarritako toki eta egunean.

Guztiak jakin dezaten argitaratzen da.

Lantziego, 2019ko urriaren 24a

*Alkatea*

*ITZIAR DE ALAVA MARTINEZ DE ICAYA*